



**Акафист
святителю Флавиану
архиепископу
Константинопольскому,
исповеднику**

Кондак 1

Взбранный воине Христов добропобедный,
Небеснаго Царя служителю всеусердный,
святителю и исповедниче всеславне,
богоизбранне и всемудре Флавиане, величающе
подвиги твоя, пение похвальное приносить
дерзаем и во умилении зовем:
Радуйся, Флавиане, веры Православныя
исповедниче непоколебимый.

Икос 1

Ангелом небесным в молитве подражание
стяжав, небесным ликом причтания сподобился
еси и во славе присносущней Престолу Божию
предстоя, молитву возносиши о всех, похвалы
сия ти приносящих:
Радуйся, пастырю всеславный,
Радуйся, наставниче премудрый;
Радуйся, Христа преславный учениче,
Радуйся, апостольских престолов наследниче;
Радуйся, царственного града украшение,

Радуйся, всея вселенная просвещение;
Радуйся, яко о тебе Церковь ликует,
Радуйся, яко пение тебе людие православнии
приносят;
Радуйся, Флавиане, веры Православная
исповедниче непоколебимый.

Кондак 2

Блажен еси, Флавиане богомудре, Господу
споследствовавший и не убоявшийся тело
убивающих, души же коснуться не могущих, но
за веру Православную мучение от волков
душехищных, в кожах овчиих пришедших,
приявший всерадостно и Подвигоположнику
воспевый: Аллилуиа.

Икос 2

Врага рода человеческого и человекоубийцы
искони диавола служителей всезлых,
Диоскора злочестиваго и Евтиха вселукаваго
обличил еси, отче Флавиане премудре, и сердца
верных в Православии утвердил еси, темже
песньми сицевыми ублажаешься:
Радуйся, мечу, еретическое злочестие
посещающий,
Радуйся, щите, верных защищающий;
Радуйся, вечная Правды благовестниче,
Радуйся, Церкви Христовы несокрушимый
поборниче;

Радуйся, догматов твердый хранителю,
Радуйся, ересей и расколов обличителю;
Радуйся, веру Православную даже до конца
сохранивший,
Радуйся, учением своим многия умудривый;
Радуйся, Флавиане, веры Православныя
исповедниче непоколебимый.

Кондак 3

Господу усердно поработавый и смерть от
вселукавых приявый, венец восприял еси
сугубый, яко святитель и исповедник, отче
всеславне, темже славу твою созерцающе,
Дивному во святых Своих Богу вопием:
Аллилуиа.

Икос 3

Два естества во единой Ипостаси Христове
православно исповедал еси, неслиянно
соединенная и неразлучно разделенная и
нечестиваго Евтиха со Диоскором
всезлобнейшим обличил еси велемудренно, сего
ради яко столп православия сицевыми похвалы
ублажаешься:

Радуйся, в броню правды облаченный,
Радуйся, щитом благодати Божия покровенный;
Радуйся, Евангелия проповедниче,
Радуйся, Нивы Господни добрый делателю;
Радуйся, Евангельская словеса в житии

воплотивый,
Радуйся, прелести мира сего ни во что же
вменивый;
Радуйся, истинныя веры всеусердный
хранителю,
Радуйся, людей христоименитых защитителю;
Радуйся, Флавиане, веры Православныя
исповедниче непоколебимый.

Кондак 5

Единого Христа исповедую во двою естеству
суца - возгласил еси Флавиане богомудре, -
прежде век от Отца рожденна и от Девы в лета
последняя рождение приявша, Бога превечна и
человека всесовершенна, емуже непрестанно
пою: Аллилуиа.

Икос 5

Животом и смертью Владычествуяй плотию
облечеса и Человек совершенный явися, еже бо
бе, пребысть и еже не бе прият, - возвестил еси,
отче Флавиане, от волков душехищных паству
свою защищающе и в православии
утверждающе всех сице вопиющих:
Радуйся, пастырю наш добрый,
Радуйся, отче милостивый и кроткий;
Радуйся, душу свою за стадо твое положивый,
Радуйся, подвигом своим нас в Православии
укрепивый;

Радуйся, яко оружие, Крест Христов приемый,
Радуйся, тем всезлобную ярость победивый;
Радуйся, светом небесным души наша
озаривый,
Радуйся, и ныне благословением твоим нас
осенивый;
Радуйся, Флавиане, веры Православныя
исповедниче непоколебимый.

Кондак 6

Зря тьму еретическую, от адовых бездн
восходящую и умы смущающую, яко адамант
твердый противостал еси кознем бесовским,
люди православныя научая славити Единого
Христа во двою естеству, Сына Божия и Сына
Девыя, нас ради страсть претерпевшаго и от
всех родов воспеваемого: Аллилуиа.

Икос 6

Ирода древняго ученицы всезлобнии, Евтих
нечестивый купно с Диоскором зломудрым,
убийство уготоваша и стрелы хуления своего
изостриша, во еже состреляти во мраце тя,
праваго сердцем, твои же во правоверии не
подвижастеся нозе, темже приими от нас
похвалы сия:

Радуйся, Путем Господним присно ходивый,
Радуйся, многих от путей погибельных
отвративый;

Радуйся, свеще, огнем ревности божественная
пламенеющая,
Радуйся, кадиланице, фимиамом молитвы
благоухающая;
Радуйся, добродетельного жития ревнителю,
Радуйся, демонского нечестия посрамителю;
Радуйся, отеческих уставов хранителю,
Радуйся, еретиков злочестивых обличителю;
Радуйся, Флавиане, веры Православная
исповедниче непоколебимый.

Кондак 7

Кладенец отставльших воды животочная и
ископавших себе студенец истления, Евтиха
купно с Диоскором всезлых безбоязненно
обличил еси, вопия: единого Христа во двою
естеству славословлю, Бога же и человека и
Сему пою: Аллилуиа.

Икос 7

Лицо едино и едину Ипостась Бога Слова
воплощенна воспеваю, - глагола еси, отче
Флавиане, - во двою естеству суца, Бога
вополощенна и Человека обоженна, Егоже
пророки древле провозвестиша и Емуже аз со
усердием служу. Сего ради прими от нас, отче,
похвалы сия:

Радуйся, образе жития нескверного,
Радуйся, явлении служения непорочного;

Радуйся, правды Христовыя ревнителю,
Радуйся, Евангельския любви служителю;
Радуйся, благодати источниче неоскудеваемый,
Радуйся, милости кладезю неистощимый;
Радуйся, души наша учением своим
просвещай,
Радуйся, сердца наша питием благочестия
напаяй;
Радуйся, Флавиане, веры Православныя
исповедниче непоколебимый.

Кондак 8

Мудрости божественныя исполнен явился еси,
отче Флавиане, безумство еретическое премудре
посрамил еси и за веру Христову страдания
приял еси, темже ныне купно с лики
мученическими и со всеми святыми песнь Богу
воспеваеши: Аллилуиа.

Икос 8

Не утрашился еси судища неправеднаго, не
убоялся еси мучителей беснующихся и
разделения плоти твоея ищущих, но, древнему
Израилю уподобився, сквозе море бушующее
прошел еси жития привременнаго, достигл еси
земли Обетованныя, темже от нас похвалы
приими сицевыя:

Радуйся, образе исповедничества всетвердый,
Радуйся, Православия поборниче препетый;

Радуйся, зеркало благодати всесветлое,
Радуйся, похвало наша всерадостная;
Радуйся, светом учения Православного нас
освещающий,
Радуйся, огня геенского твоими молитвами
избавляющий;
Радуйся, путь ко Христу указующий,
Радуйся, от пути нечестия отвращающий;
Радуйся, Флавиане, веры Православных
исповедниче непоколебимый.

Кондак 9

Православия наставниче, благочестия учителю и
чистоты, отче достославне Флавиане, молитвами
твоими от бед и искушений вся ны свободи, да
купно с тобою Троидинаго Господа прославим,
Ему вопиюще: Аллилуиа.

Икос 9

Радости неоскудеваемая достигла еси
присталища пристанища, отче Флавиане, море
преплыв зловредных искушений, темже от нас
песньми сицевыми славословишися:
Радуйся, Архиерея Вечнаго служителю
всеусердный,
Радуйся, Небеснаго Домовладыки рабе благий и
верный;
Радуйся, жатвы Господни делателю
неленостный,

Радуйся, о людех православных молитвенниче предивный;
Радуйся, огнем божественным разженный,
Радуйся, светом Истины осиянный;
Радуйся, спасения многих взыскавый,
Радуйся, вся любовью твоею объявый;
Радуйся, Флавиане, веры Православныя исповедниче непоколебимый.

Кондак 11

Сына Божия и Сына Девы проповедал еси, единого Христа во двою естеству нас ради пришедша, Темже от Него приял еси сугубую благодать о нас ходатайства приносити и о спасении молити всех, Богу воспевающих: Аллилуиа.

Икос 11

Терпения столп был еси, отче всеславне, за веру Христову избиение и раны, темницы и злохуления, поношение и смерть лютую от безбожных еретиков приемше. Темже верныя чада Церкви, подвиги твоя почитающе, пение ти приносят:

Радуйся, святителю богоизбранный,
Радуйся, архипастырю богопросвещенный;
Радуйся, образе исповедничества всетвердый,
Радуйся, Православия поборниче препетый;
Радуйся, еретическая злохульная уста

заградивый,
Радуйся, православное учение всеславно
возвестивый;
Радуйся, зеркало благодати всесветлое,
Радуйся, похвало наша всерадостная;
Радуйся, Флавиане, веры Православных
исповедниче непоколебимый.

Кондак 12

Фараона древняго наследницы злохульня,
Диоскор и Евтих злоименный, потопление
прияша в море учений твоих, ты же, отче, веру
православную яко столп всесветлый пред очима
своима имуще, достигл еси Небеснаго Царствия,
идеже о всех чадех Церкви молишися, песнь
воспевая Богу: Аллилуиа.

Икос 12

Христос Бог венцем небесным украси лик твой,
священнострадальче и исповедниче всеславне
Флавиане, и Церковь подвиги твоя воспеваает
присно:

Радуйся, светом небесным нас освещающий,
Радуйся, огня геенского твоими молитвами
избавляющий;
Радуйся, росе, еюже огонь безбожия угашается,
Радуйся, морю, имже зловерие потопляется;
Радуйся, трапезою Небесною насыщенный,
Радуйся, питием безсмертия напоенный;

Радуйся, Царствия Христова сонаследниче,
Радуйся, Воскресения Его сопричастниче;
Радуйся, Флавиане, веры Православных
исповедниче непоколебимый.

Кондак 13

О, преславне и досточудне отче Флавиане, веры
Православных исповедниче и о всем мире
молитвенниче всеусердный, ныне предстоя
Престолу Славы Божия о всех нас моли, да
избегше искушений и соблазнов, с тобою пети
сподобимся: Аллилуиа.



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

†

НОВОЕ
* НЕБО